

DEEL 2

Teks: Handeling 16 - 28

Hulpmiddels:

- Kopieë van die skulpie
- Kopieë van die tronk-prentjies
- Skuifstukkies en dobbelsteentjie
- Uitdruk van die hersieningspeletjie (lamineer indien moontlik)
- PowerPoint en video (Beskikbaar op ons webwerf)



WELKOM

Speel: "Paulus, Silas en die soldate" (soos Kat en muis):

Kies kinders om die volgende te wees: Paulus, Silas en 2 soldate. Die kinders wat oorbly, vat hande en maak 'n kring. Paulus en Silas moet nou probeer wegkom van die soldate af. As hulle by die kring kom, lig die kinders hulle hande op om hulle in die kring te laat inkom. As die soldate naby kom, hou hulle hul hande af om te keer dat die soldate Paulus en Silas vang. As Paulus of Silas gevang word, word daardie soldaat weer Paulus of Silas en een van die kinders in die kring word weer 'n soldaat. Hou 'n paar minute aan met die speletjie.



WYDING

Sit stil op 'n plekkie, haal diep asem en blaas weer uit. Luister na "Heart to change the world" soos by ontmoeting 14.



WOORD

Paulus was vuur en vlam om vir almal die Goeie Nuus te vertel. Hy moes baie keer vlug en was nie orals welkom nie. Dit het hom nie gekeer om die boodskap te verkondig nie. Verlede keer het ons gehoor van sy bekering en die eerste reis wat hy onderneem het. Vandag gaan ons verder met sy storie...

1	Die storie van Paulus en sy reise (deel 2)
2	Silas het saam met Paulus op sy tweede reis vertrek.
3	Speel die video "Paulus se visioen en Lidia se bekering".
4	Paulus en Silas het aangehou om almal van Jesus te vertel. Jesus het hulle gehelp om 'n meisie van 'n bose gees te bevry.
5	Haar eienaars was kwaad, want toe kon sy nie meer vir hulle geld verdien met haar waarsêery nie.
6	Hulle is geslaan en in die tronk gegooi.
7	Hulle het mekaar aangemoedig om nie moedeloos te word nie. Hulle het deur die nag liedere bly sing om God te loof.
8	Die ander gevangenes kon nie verstaan hoe hulle kon aanhou om God te prys al is hulle in die tronk nie.
9	Hulle vriende het aangehou om te bid dat Paulus en Silas gered sal word. 'n Groot aardbewing het gemaak dat al die tronkdeure oopgegaan het! Die bewaarders was baie bang. As die gevangenes sou vlug, sou die bewaarders in groot moeilikheid wees.
10	Maar Paulus en Silas het nie weggehardloop nie. Die bewaarder was baie verlig. "Ons het nie weggehardloop nie, want ons weet God is by ons en Jesus is God se Seun," het hulle vir die tronkbewaarder gesê.
11	Die bewaarder het toe gesê: "Vertel my van Jesus."
12	Paulus en Silas het vir hom alles oor Jesus vertel. "As jy glo dat Jesus God se Seun is, kan jy ook Sy kind word," het hulle vir hom gesê. "Ek glo," het die bewaarder gesê.
13	Hy het vir sy hele familie vertel wat gebeur het. Hulle het ook gaan luister na wat Paulus en Silas vertel het. Hulle het in Jesus geglo en hulle is gedoop.

14	Die volgende dag het die stad se leiers laat weet dat Paulus en Silas vrygelaat kon word. Hulle het al hul Christen-vriende by Lidia se huis gaan groet en uit die stad vertrek.
15	Paulus het baie ondervindinge op sy reise beleef.
16	In Korinte het hy Akwila en Priscilla ontmoet. Hulle was ook tentmakers soos hy.
17	Paulus het 'n tyd lank by Akwila en Priscilla gebly. Hulle was getroue Christene in Korinte. Hy het saam met hulle tente gemaak en vir hulle geleer hoe om vir ander mense van God te vertel.
18	Silas en Timoteus het later ook by hom aangekom in Korinte. Hulle het saam verder gereis.
19	'n Kaart van Paulus se tweede reis van begin tot einde.
20	Paulus het nog baie avonture beleef.
21	Hy het op 'n derde reis vertrek waar hy weer die gemeentes besoek het.
22	In Efese het die silwersmid, Demetrius, baie kwaad geword vir Paulus. Demetrius het beelde van die godin Diana gemaak, maar nou was daar mense wat in God glo en nie meer afgode wou koop en aanbid nie. Die hele stad was in oproer! Die gelowiges het Paulus aangeraai om nie met die mense wat in opstand was te praat nie, maar eerder by hulle te bly.
23	Paulus het net 'n rukkie daar gebly en toe die reis terug aangepak.
24	Paulus en 'n paar van sy vriende het in die hawe van Troas aangekom.
25	'n Klomp Christene het bymekaargekom om te hoor wat Paulus vir hulle wou sê. Hulle het 'n kamer op die derde vloer van 'n huis volgepak.
26	Eutigus was 'n jongman wat ook wou hoor wat Paulus alles vertel. Hy het sommer in die vensterbank gesit.
27	Paulus het aanhou praat en praat en praat. Eutigus het baie vaak geword...
28	... En aan die slaap geraak! Hy het by die venster uitgeval tot op die grond. Hy was dood.
29	Almal het afgehardloop na waar Eutigus gelê het. Paulus het hom in sy arms geneem en gesê: "Hy is okay." En toe het Eutigus weer gelewe!
30	Almal was baie bly dat Eutigus weer lewendig was.
31	Paulus en sy vriende is weg uit Troas en het die ouderlinge van die gemeente in Efese gaan groet. Hulle het verder gevaar, by die eilande en uiteindelik by Sidon aan land gegaan.
32	Die derde reis het in Jerusalem geëindig.
33	Die profeet Agabus het vir Paulus vertel dat hy gevang sal word as hy na Jerusalem toe gaan.
34	Maar Paulus het vir sy vriende gesê dat hy sal doen wat God van hom vra.
35	In Jerusalem was daar baie moeilikheid en Paulus is vals aangekla en in die tronk gesit.
36	Die volgende dag het omtrent 40 Jode bymekaargekom. Hulle maak toe 'n geheime plan oor hoe hulle vir Paulus kan doodmaak. Hulle het gedink dat God van hulle plan hou. Daarom besluit hulle om nie te eet of te drink totdat Paulus dood is nie.
37	Hulle gaan toe na die Joodse leiers by die tempel en vertel vir die leiers van hulle plan. "Julle moet ons help met ons plan. Vra vir Generaal Claudius om weer vir Paulus na die Joodse hof toe te bring. Sê julle het nog vrae wat julle vir Paulus wil vra. Ons sal in die bosse langs die pad wegkruip. Nes hulle by ons kom, sal ons uit die bosse spring en Paulus doodmaak."
38	Paulus se suster se seun het van die Jode se geheime plan gehoor. Die seun het vir Paulus daarvan gaan vertel. Die kaptein het die seun geglo en gereël dat Paulus in die nag van die een tronk na die ander een verskuif word.
39	Die bevelvoerder het toe 200 soldate, 70 soldate met perde en 200 soldate wat goed was met swaarde en spiese, gestuur om Paulus in die nag na Seserea toe te vat.
40	Paulus moes aan die goewerneur Felix verduidelik waarom hy as gevangene na hom toe gebring is.
41	Hy het hom vir 2 jaar in die tronk opgesluit.

42	'n Nuwe goewerneur, Festus, het aan bewind gekom.
43	Paulus het vir hom gesê dat hy niks verkeerds gedoen het nie. Paulus het hom op die keiser beroep.
44	Paulus is uiteindelik per skip na Rome gestuur. Tydens die reis het hulle 'n wonderlike ervaring gehad.
45	Paulus moes saam met ander gevangenes en 'n klomp bewaarders op 'n skip klim na Rome toe. Op pad na Rome was daar 'n groot storm wat 14 dae lank gewoed het.
46	Terwyl Paulus gebid het, het 'n engel vir hom gesê dat hulle gered sou word.
47	Niemand wou eet terwyl hulle in die storm was nie. Paulus het vir almal gesê om te eet sodat hulle die volgende dag sterk kan wees as hulle gered word.
48	Hulle het alles wat onnodig was, van die skip afgegooi. Teen die oggend was hulle naby aan die strand.
49	Op pad strand toe het die skip stukkend gebreek.
50	Almal kon uitswem of op stukke dryfhout dryf tot op die strand. Almal is gered.
51	Hulle het veilig die land bereik. Hulle was nou op die eiland Malta.
52	Dit was koud en hulle het stompe opgetel om 'n vuur te maak.
53	'n Giftige slang het vir Paulus gepik terwyl hy help om hout op te tel.
54	Paulus het die slang in die vuur gegooi en gebid dat God hom moet bewaar teen die gif van die slang.
55	Die mense kon nie glo dat Paulus nie doodgegaan het nie.
56	Toe hy nie sterf nie, het almal gedink dat Paulus self 'n god is. Hy kon toe vir hulle vertel van die een, ware God.
57	Paulus het ook die eilandhoof se pa gesond maak, asook ander mense wat siek was. Na 3 maande op die eiland, kon hulle weer verder vaar Rome toe.
58	Paulus was weer 2 jaar lank 'n gevangene in Rome. Hy kon wel in sy eie huis bly, maar Romeinse soldate het hom die heelyd opgepas.
59	Al was Paulus 'n gevangene het hy nog steeds baie mense bemoedig en gepreek deur die briewe wat hy vir gemeentes en individuele mense geskryf het.
60	Paulus is uiteindelik in Rome oorlede. Dit was 'n baie hartseer gebeurtenis, want hulle het hom doodgemaak omdat hy in Jesus geglo het. Hy was vir ons 'n voorbeeld van 'n kind van die Here wat gehoorsaam was en tot aan die einde van sy lewe getrou was aan sy roeping.



WERSKAF

- ◆ Gebruik die patroon van die skulpie. Die kinders skryf Lidia se naam op die voorkant van die skulp. Binne-in is die teks: Hand 16:14 – 15a: “Lidia ... het handel gedryf met pers wolmateriaal en was van Tiatira afkomstig. Die Here het haar vir Paulus se woorde ontvanklik gemaak. Sy en haar huisgesin is gedoop.” (’n Sekere soort skulpie is gebruik om materiaal pers te kleur en dit was baie spesiaal en duur in Lidia se tyd.)
- ◆ Maak “tronkprente”: Elke kind kry ’n A5-grootte karton. Vou dit in die helfte. Teken ’n gesig op die een kant en regaf strepe op die ander kant. Plak nou ’n sosatiestokkie agterop die een helfte vas sodat die helfte van die stokkie onder uitsteek. Plak ook die kante van die papier op mekaar vas. Wys vir die kinders hoe hulle die stokkie tussen hul hande kan vryf sodat die prentjies heen-en-weer beweeg. Dit behoort te lyk asof die gesig agter tralies is.
- ◆ Hersieningspeletjie: Speel die hersieningspeletjie aan die einde van hierdie ontmoeting. Plak die 2 bladsye langs mekaar om die volledige speletjie te kry. Kinders kry elkeen ’n skuifstukkie en kans om die dobbelsteentjie te gooi. In die blokkies is opdragte. Elkeen voer die opdrag uit van die blokkie waarop hy land. As dit iets positiefs was, skuif die speler aan, maar as dit iets negatiefs was, skuif hy terug. (Dit werk basies soos slangetjies-en-leertjies.)

Sluit af met die seënbede.



“Lidia...

het handel gedryf met
pers wolmateriaal en was van

Tiatira afkomstig.

Die Here het

haar vir

Paulus se

woorde ontvanklik
gemaak. Sy en haar
huisgesin is gedoop.”

Hand 16:14 - 15a

Paulus se reise Hersieningspeletjie



9
'n Slang pik Paulus op Malta, maar hy sterf nie. Bly net waar jy is!

8
Paulus en Barnabas stry. Skuif 3 terug.

7

10
Ananias bid vir Paulus en hy kan weer sien. Skuif 4 aan.

6
Paulus raak blind op die pad na Damaskus.

11
Die goewerneur op Siprus raak gelowig.

5
'n Slawemeisie word van 'n bose gees bevry. Skuif 2 aan.

4
Krispus (hoof van die sinagoge) en sy familie raak gelowig.

3

2
Paulus ontsnap oor die muur in 'n mandjie. Skuif 2 aan.

12
Paulus is ontsteld oor al die afgode in Atene. Skuif 7 terug.

1

13
Paulus kry 'n droom om na Masedonië te gaan. Skuif 8 aan.

Begin hier:
Sodra jy 'n 6 gegooi het, kan jy begin.

14
Paulus bly by Akwila en Priscilla in Korinte. Skuif 9 aan.

